

20/02/2003

NAM perlu bantu selesai isu perang

KUALA LUMPUR: Datuk Seri Dr Mahathir Mohamad berkata, Pergerakan Negara-Negara Berkecuali (NAM) tidak mempunyai pilihan kecuali membantu menyelesaikan masalah peperangan dan keganasan sebelum perhatian boleh ditumpukan kepada menolong negara anggota.

Perdana Menteri berkata, selepas menyelesaikan krisis masa kini, NAM harus mewujudkan satu strategi munasabah dan perancangan bagi membantu negara anggota miskin dengan kerjasama antarabangsa.

"Hanya ketika itu dunia akan memberikan perhatian kepada masalah ekonomi

dan politik yang dihadapi negara anggota NAM," katanya.

Beliau menjelaskan demikian dalam satu jawapan bertulis kepada soalan majalah New Voice of Asia yang memberi fokus terhadap NAM, yang mengadakan

sidang kemuncak ke-13 bermula di sini hari ini.

Ketika dunia kebanyakannya leka dengan isu keganasan global dan perang,

Dr Mahathir ditanya apa yang boleh dilakukan NAM untuk mengalih perhatian

kepada masalah utama antarabangsa seperti peminggiran negara membangun berpunca daripada kemajuan teknologi dan ketidakseimbangan dalam sistem perdagangan pelbagai hala di bawah Pertubuhan Perdagangan Sedunia (WTO).

Dr Mahathir berkata, NAM boleh mengetengahkan satu pandangan rasional mengenai punca keganasan dan keperluan menghapuskan masalah itu selain hanya meningkatkan keselamatan dan penggunaan senjata.

Sambil mengakui NAM masih menghadapi banyak masalah dalam bidang politik, ekonomi dan sosial, Perdana Menteri berkata pergerakan itu perlu

mengenalkan diri mereka sebagai satu badan bagi menguatkan pengaruh.

Beliau juga ditanya mengenai cadangan supaya NAM ditukar menjadi satu pertubuhan rasmi dengan penyediaan sebuah sekretariat tetap dan infrastruktur pentadbiran yang lain.

Mengenai perkara ini, Dr Mahathir berkata negara anggota NAM tidak kaya

atau mempunyai terlalu banyak perbezaan dan percanggahan kepentingan bagi

mereka untuk menyokong sebuah sekretariat tunggal.

Pertubuhan itu, katanya, hanya boleh memberikan sokongan umum bagi segelintir isu tertentu.

NAM bukan sebuah pertubuhan dan oleh itu tidak mempunyai struktur rasmi

seperti perlembagaan, sekretariat atau badan eksekutif. Pergerakan itu mempunyai satu biro penyelarasan di Pertubuhan Bangsa-Bangsa Bersatu

(PBB)

yang menyelaras semua aktivitinya.

Mengenai sama ada saiz pergerakan itu telah membantu atau menghalang pencapaian objektifnya, Dr Mahathir berkata semakin banyak anggotanya, NAM

NAM

semakin berpengaruh untuk menarik perhatian kepada masalah negara

anggota.

Berhubung relevannya NAM berikutan tamatnya Perang Dingin dan kebangkitan sebuah dunia unipolar yang berpaksikan Amerika Syarikat, beliau berkata jika orang menganggap NAM sebagai sebuah pengimbang untuk membetulkan ketidakseimbangan dalam konfrontasi Timur-Barat, maka NAM tidak lagi relevan.

Tetapi, dengan memberi contoh negara Utara yang agak berpecah dalam memutuskan sama ada menyerang Iraq atau tidak, Dr Mahathir berkata NAM boleh menggunakan pengaruhnya mengikut kehendak anggota.

Dalam kes ini, katanya, ia harus menyokong atau membantah peperangan.

Dr Mahathir berkata bidang yang menjadi keutamaan dalam agenda sidang kemuncak NAM ialah isu-isu semasa terutama kemungkinan perang terhadap Iraq dan penggunaan perang sebagai satu penyelesaian terhadap konflik antarabangsa.

Bayang-bayang yang mengerikan menghadapi kemungkinan serangan Amerika, terus mengancam rakyat Iraq, yang menerima tuduhan bahawa negara yang kaya dengan minyak itu dengan penduduk seramai 24 juta, memiliki senjata pemusnah besar-besaran.

Ditanya sama ada pendekatan pemuafakatan dalam membuat keputusan di NAM

menyebabkan pergerakan itu lebih atau kurang berkesan, Dr Mahathir berkata

keputusan melalui kata sepakat selalunya menghadapi masalah.

"Bagaimanapun kecuali perkataan yang digunakan tidak terlalu keras, kata

sepakat boleh dicapai," katanya.

Perdana Menteri juga ditanya sama ada beliau yakin mengenai masa depan negara NAM dari segi kemajuan yang dicapai dalam bidang sosio-politik seperti mempunyai sebuah kerajaan demokratik, pembangunan yang mengutamakan rakyat dan perlindungan hak asasi manusia.

Sambil menyatakan ia adalah satu proses yang lembab dan menyakitkan, Dr

Mahathir bagaimanapun berkata NAM akan sentiasa menjadi alat berguna bagi

negara Selatan.

New Voice of Asia adalah majalah diterbitkan tiga bulan sekali bermula pada 1998 untuk membalas laporan negatif krisis kewangan ketika itu.

Bagaimanapun ia berhenti beroperasi selepas satu setengah tahun.